

li mortem, sed senectutem, ut Romanis manus darent; ante scilicet belli finem, quem sane expectassent, si non necessitas, at infidelitas, illos ad Pœnos trajecisset. Post hæc autem, ait Livius, nihil amplius ab Hannibale actum in Italia. *Nihil certe ultra rei in Italia ab Hannibale gestum*; ac proinde hic ultimus Brutiarum urbium ad Romanos reditus, quem quidem non vis, non necessitas, sed voluntas movit, amor impulit, fides perfecit.

§. VII.

M. Catonis testimonium, quo A. Gellius utitur, examinatur, & quantæ sit auctoritatis ad rem probandam quam intendit, ostenditur.

M Porcius Cato, Censorius, patria Tusculanus, civitate Romanus, Tribunus militum in Sicilia, & Consul Romanus, natus est an. U.C. 519, Mundi 3716., ante Christum 232., ait Thomas-Pope Blount, in Censura celebriorum Auctorum. Ex Cornelio Nepote, ab adolescentia confecit orationes, senex historias scribere instituit, quarum sunt libri septem. Fertur etiam scripsisse de Originibus; attamen Vossius de Historicis Latinis observat: *Illis Originibus, quas pro Catonianis obtrudere nobis voluit Annius Viterbiensis, nihil profecto inscitius, Catoneque indignius; eam imposturam, non multo postquam in lucem prodierant, Sabellicus vidit, Enneadis 10. lib. 2., item Faber Stapulensis, Vives, B. Rhenanus, atque alii.* Et ex Panvinio lib. 1. antiquit. Veronens. c. 9. apud Blount, habemus: